

然後足以相副。繼此以往。諸事之應辦者愈衆。則報章之陳說愈難。諸事之待舉者愈多。則報章之責任愈重。我國報章之發達。約可分爲數期。光緒初元至甲午以前爲萌芽期。甲午後至庚子前爲發生期。庚子後至甲辰前爲增長期。甲辰後至今則應由增長期而入成立期。夫人之生也。必具五官四支。聰明智識。體格堅壯。思慮徇通。然後可謂之成立。今報章既由增長時代而進於成立時代。則其識見。其學問。其思想。其議論。皆必由粗而歸於精。由渾而歸於畫。由膚而歸於切。然後足以盡監督國民之任。而奏改良社會之功。我同志而不欲肩此任乎。環顧中原。寥寥無幾。處八面受敵之局。際萬端待理之時。又當報務更張之會。而僅恃三五報章爲之鼓吹。風雨如晦。而雞鳴輟音。來軫方遘。而馬瘃致歎。我國民其謂之何。此則本報之所以不能無作也。

署兩江總督周奏選派員匠分赴英德各廠學習製造以裕軍儲摺

竊查上海製造局諸事廢弛亟須改良。經臣與北洋大臣商定辦法。劃出船塢另派大員經理。前經奏明在案。查滬廠所造彈丸火藥鍊鋼製礮等事。皆因摹仿而成。非由心得。終未精良。上年曾派員匠赴鄂廠考察。以期觀摩。取益惟良。匠難撥且滬廠機器不全。非赴外洋細心考驗。無從購補。查製槍製礮爲費甚鉅。非一時所能驟辦。彈丸火藥則須多製以供操防。

現查南北洋所用各種槍礮之彈丸無煙藥栗色藥皆爲行陣要需刻不容緩應卽先就現有經費加工精製以儲軍實一面選派委員學生帶同明練機匠同赴英德各名廠學習講求並考察製造槍礮彈藥及鍊鋼之法學生未習機器則藉匠人爲目驗匠人不通言語則藉學生爲舌人兩者相成易於深造至稽查約束須人經理查有分省補用道李經敘精練核實堪以委令帶往應如何分駐各廠分習機件俟到歐洲後稟商英德駐使博訪周諮擇定分派所需經費仍就滬廠籌撥但學成歸國至速計須數年工匠不能久閒機器不能虛設此數年中擬先雇東西良匠來滬試辦訂立合同約定年限合同期滿華匠學成可以自行製造卽仿日本辦法將洋匠辭退如此前後承接則目前既不曠誤後日更復精良此誠正本清源之計用費雖鉅成效可期臣與北洋大臣袁世凱往復電商意見相同擬卽照此舉辦謹 奏奉 硃批該衙門知道欽此

山西巡撫張奏籌款開辦師範學堂先授簡易科摺

竊維振興學務以多設蒙小學堂爲始基而成就教員尤以開辦師範學堂爲要務晉省各蒙小學堂雖已次第設立而教員不由學堂出身一切管理教授未能如法實有師勤功半之虞臣自前年到任屢思措辦此事祇以財用奇絀無款可籌未能舉辦去冬查得各州縣